

無上黃錄大齋立成儀卷之五十七 食

附錄修書本末

先君存齋先生諱叔與字德瞻舊字蕭韞姓蔣氏自梁普通世居永嘉曾祖諱扶祖諱敦贈中大夫父諱行簡朝議大夫知處州贈中奉大夫紹熙壬子先君以郊恩補迪功郎揚州戶掾會計當耗數息以清介聞中奉薨帥道侯輩深嘆惜其去往臨安排岸丁孫令人憂監仁和鹽場亭戶祭點數敗事先君稱制出納一繩以法咸稱其廉平畏其威而懷其惠比三歲額溢倍徙特恩轉承直郎為岳州軍節推乙亥早蝗亘數路豫疏畫荒政力贊守推行之市無貴糶野無飢民鼎民有誣李氏用人野祠者守籍其家實諸極典獄具憲忽自疑撤先君鞠之鈎撻故蹟一訊得其情悉平反之所全活者數十人淳熙末中奉鎮鼎有惠政民懷之祠于梁山及先君審李氏冤感泣者于路曰吾固知其為將使君之子也承吉州水新不踰年舉賢陞知信州弋陽縣縣網壞久歲餉江淮軍戶解淮東總所捨

積銀類取贏額外地燒瘠俗慎忤影寄詭挾者連阡陌下戶苦役產破者相踵先君躬按版籍捐吏姦平易近民務通下情剖決滯訴以蘇洗冤負填解積逋以少紓督趣鋤治強梗以扶植良善士民條畫利病以告者立罷行之僻墟寂墅縷紳稚耆聚談慨嘆歌德政者不絕徹于天朝社稷壇壝蕪穢風雨師寄他所悉更新之植以所宜木覺舍厝廩樓館廢壞者葺理不倦費取諸經用之餘蓋前政所買名以自潤者非鞠死罪獄無宿囚惇獨琴孺有以情訴率得直庭不留訟志在於民絲髮不縷諸吏戴星出入壺臺忘勸竟以憂勤得疾疾已侵視官文書如故禺中猶囑貳令母施縣網夜漏上端坐而終時嘉定十年正月二十六日也享年六十有二積階承議郎以辛巳明堂恩賜五品服嗚呼痛哉先君幼穎悟明銳靈燭古今載籍博覽不倦一二過目畢成誦敬誠篤實語不妄發賦性冲實字意寬和人與之交邈不見其喜愠之色工唐律清苦雅淡自得其趣志不安於小成

旁羅百氏天文地理運氣律曆倉坡俞方甘星巫學靡不研精深造而於混元道德之旨尤所耽味慶元乙卯仲靖留君來括蒼先君見之煙雨樓與論古齋法趣高玄合遂定交已未壬戌再訪仲靖竹宮極講究之仲靖嘉嘆悉以平生得於荆蜀方士隱君子者授之先君通其變而施行焉每試輒驗緩急叩請悉無拒祛怪極危靈異響答初仲靖謂先君曰以三洞真經為道本以十方懺謝為真誠精思九朝密投三簡齋法如是而已譎詭幻怪迷誤眩惑非也又曰度人無量萬道之宗泰定田君居實所傳止於度死消天災鎮帝王攘毒害所以度天人者欵如也蓋詮考經法且增益田君所未備不亦善乎先君深惟師訓竊病時俗逐流志返徇華滅質剝切緒餘工習聲音以為悅依託罔象附會影響以為神波流風動邪說屍亂於是比次舊聞根極原起官遊所歷奇書妙蘊瓊章藝苑披閱殆遍螢窗寒燭不倦抄述辭語之鄙淺者釐而正之作用之外訛者辨而折之旨訣之異

同者整齊之使歸一節目之殺亂者刪合之使復正為黃籙齋儀三十六卷自然齋儀一十五卷度人修齋行香誦經儀二十四卷總之曰靈寶玉檢合七十五卷始於嘉泰壬戌成於嘉定癸未上下二十年其扶翊大教用心勤苦如此朱遂林堯夫陳自誠趙希火之徒嗣其法將易黃籙齋等曰死生命也當貴天也吾書幸垂成而大期忽屆我若死汝等當歸吾書于宗壇庶齋法或自是流暢幽明蒙賴則吾志願畢矣士之立身惟母友不如己者而已言訖瞑目而逝既定容體如生嗚呼天乎痛哉處死生之際而不亂蓋先君之有得於道德玄元之宗指者深矣屢等街哀茹苦敬遵治命再四校覆謹以遺書緘藏名山且附錄其歷官大節纂述之本末於後以俾後人有考云嘉定癸未七月不孝孤癸法名冲素法名冲一等泣血謹識

宋冲靖先生留君傳

華文閣學士通奉大夫提舉江州太平興國宮奉化郡開國侯食邑

一千四百戶食實封一伯戶高文虎撰并書

冲靖先生名用光字道輝姓留氏其始河洛人也六世祖仕唐官銀青光祿大夫五代時徙家泉之晉江宋興削平四方五世祖扶萬才西游江淮間過上饒郡樂貴谿雲峯山遂結廬父發清修特立有古君子風備其室詹氏拜錄龍虎山夜夢漢天師授以丹曰服是當有子而德遂娠先生既誕秀異渾古端怒自持少解悟玄學受法于上清正一宮道士蔡元父元父宣和間太素大夫擬神殿校籍王道堅三世孫也既入道抗志精堅守一淵確探蹟索隱窮靡險艱凡金簡玉字瓊篆琅函之目十洞要訣三皇內文能盡究旨歸別條緒焉諸法書靡一不練專以玉府五雷法正一法為宗主密行元鍊垂三十年孝宗皇帝崇至化玩希夷懷柔九僊用毗大政三衛歲大旱郡太守沈侯作礪聞其善召風雷擇佳寮持禮屈致既至大書篆簡虎將吏呼叱鬼神奔走河嶽之勢肅如也郡縣吏農父老

且嗟且愕即日天大雨四境霑澤守以上聞行在早上覽奏天悅召赴闕舍太一宮趣致雨箴法如初又刊鐵券驅龍師有頃雨迅怒如霆西湖漕河涸不舟者五盈上遣內璫嘉諭今以龍歸須臾雲解散日穿漏上嘉甚延見選德殿褒獎甚隆錫牙簡金綵授右街道錄居高士齋請歸故山後一年遣使趣召途中值雨顧使者曰某之禱久矣天其孰分疆理乎用至闕雨隨車來上曰信乎其行業清高精誠感格矣御奎翰賜以八字既拜賜進且謝曰聖德動天雨且不違臣誠懇懇何力有焉冬不雪受詔舉法告于山川百神曉雪平尺上益神之德壽宮劉貴妃薨宮中修黃籙夜有影響如見李夫人者君對使殿咨以鬼神之事對曰一陰一陽之謂道鬼神者陰陽不測之謂也聚成形散為炁道家乘炁復神之法鬼神之情狀可窺矣上以為然且曰法中有正一旨要文該義與蓋訓詁之書奏御詔錄傳未幾又告歸拜主管教門公事龍虎山上清正一宮管轄光宗受禪偶違豫壽

皇有憂色命以法校樣俄現巨神被髮橫劍殿下左右驚視帝躬清安兩宮相賀賜號冲靖先生固辭上即位祈雪夜拜級章星斗猶離離曉以賀雪奏上奇之陞左街道錄擢太一宮都監壬戌歲早上議以兩方登壇場行雨法雨聲忽如江海音上曰留君雨師也賜宸翰牙簡明年又閱雨對內殿曰臣草菅細微年年籲天

上帝有譴罪在不赦黃冠祭酒臣何敢專尸焉上曰為朕請命帝實汝嘉母辭時即得雨郊祀禮成謁謝太一宮遷左右街道錄一日忽曰生有涯知無涯以有涯隨無涯殆已士不委身霄壤滅景雲林留連京師動煩世主吾其過歟力丐歸既歸詔趣來者數四以病辭歲旦日謁帝真與宮中士會拜笑且訣有問者曰何之對曰遊乎無何有之鄉矣又問曰其朝白玉京歟燕蓬萊島歟對曰一念條萌是曰妄想達人大觀孰來孰往入室端坐而化閱七日顏色如生真所謂尸解者乎遺表聞上嗟悼降御香賜贈禮給官葬自居竹

宮時王侯諸公貴人家廷見蓋禮建齋露禱問道受法者皆傾誠竭力人人得其歡以符水濟人危厄無告者戶外屨如織夜繼日書篆與人無倦意不給鬻餅者資之齋醮科率必舊文每曰人以情扣帝閭豈無辭達焉自為製謨人所不能言者曲折宣揚之章詞表疏牒檄戒誓之文累數百紙無一差江浙間建黃錄大齋會者萬計貯鑿感應錄載元冊

一日壽康皇后殿召設大醮為皇帝千有二百各陳幣巨嚙監護者曰先生富矣笑不答禮既盡夏星帶向楮錢燎之推賜金新正一宮中殿藏數十楹輪奐甲江南又鈔諸部經內之藏荒基圮觀壞橋隳路多所補治患之周急尤切切若揚氏蘇於墟火程氏仲於銓庭拯王益於覆舟全於非命人尤稱之子思氏言至誠能盡其性至于能盡人之性能盡物之性孟子言自可欲之善至于不可知之神視諸業尚冲密勤忘幽深理心事天所保惟奇道接靈鬼仁函死生功聞紫清名在玉籍其心主乎誠其用幾乎神未易以道

家者流窺得法者郭友諒之流十餘人贊曰漢文帝召見貫生宣室夜問鬼神之事則鬼神尚矣孝宗聰明英敏非帝可及便殿所啓猶奉拳乎茲挺挺哉留君能以正對夫以三靈和同則動天地順雨暘不難於力天所不能神其用者人成之人所不能極其藝者鬼神與之迄以美利利乎民是與訪咷峒求蓬萊者異矣嗚呼孝宗仁矣夫

無上黃錄大齋立成儀卷之五十七